



QUÆSTIO MEDICA,

QUODLIBETARIIS DISPUTATIONIBUS,

*manè discutienda in Scholis Medicorum,
die Foris nonâ Decembris.*

M. NICOLA O BAILLY,

Doctore Medico, Præside.

An humani corporis fabrica præst Anima?

I.

DEBEMUR morti nos nostraque. Illius rapacitati opponitur, qui cuncta producit Amor. Ad hunc fertur homo patentum sanguine, à quo sæpe corporis, & animi dotes. Naturæ generationem intendentis esca voluptas, quâ vitam interdum infestat propriam, qui lucratur alienam. Animal illud rationis particeps Instrumenta obtinet, eximiâ quâdam vi voluptatis percita. Hinc sapidum hoc venenum libat; dulcem hanc amaritudinem experitur; hinc quoque in veneris agro Pallas sibi vindicat usum. Mas & fœmina sibi sunt invicem *χαεσι-τοβδίασεν*; gratum sibi mutuò infligunt vulnus. Mulierum vultu lubricò aspici mares incenduntur; visò quoque mare ardet fœmina. In utrisque pariter fit spirituum, partiumque jucundus motus, à quo animorum consensus & copula corporum. Hæc maris & fœminæ conjunctio, immortalitatis amica, regnorum, & humanitatis seminarium est. Fœmina, altera speciei humanæ pars, non monstrum. Illa non minores in generatione agit partes; cui uni, licet semen non effundat, maris generatio referenda est. Humor quò sæpe rigantur genitalium pomæcia, æstrum est veneris, saliva seminalis, non semen. Unus mas semen spiritu turgidum effundit; fœmina verò ovum largitur: hoc materiæ locum; illud formæ vices gerere verè dicas. Ab his duobus tota pendet corporis humani fabrica, quibus omnes corporis formandi partes continentur, atque spirituum luce velut ex orco emergunt.

DE I. legibus obsequitur natura, quæ veluti monstorum-aversari, sic sceminarum productionem intendere videtur: adeo illa eodem semper artificiosò apparatu, humano generi cudendo adornat officinam. Mulierum partes generationi dicata, externæ sunt, & internæ. Illæ dicuntur genitalis muliebris ambitus, quem infimâ, & interiori parte frænum terminat, certius forsan, quàm hymen, aut carunculæ myrtiformes, virginitatis illæ signum. Hæ vaginam, uterum, vasa præparantia, tubas, & testes complectuntur. Testium præcipuè, & tubarum compositionis atque usûs, hic sumus solliciti. Ovis continendis testes; eorundemque in uterum, in quo foveantur, deductioni tubæ interferviunt. Hos usûs, probat illarum partium structura. In testibus animadvertite superficiem tum ob contentâ, cum ob involucri sive depressum, sive retractum, inæqualem; animadvertite contenta in illis secundum, vel præter naturam corpora. Insunt à naturâ vesiculæ, quas sanguineis vasis ipsas subeuntibus, ab hydatidibus distinguunt. Sunt quoque secundum naturam globuli glandulis conglomeratis similes, propriâ membranâ involuti, post coitum duntaxat deprehendendi, eoque plures, aut pauciores, quò animal plures, paucioresve editurum est fœtus. Tubæ ab uteri fundo, angustò principiò ortæ, cum ad testiculos accedunt, dilatantur, rursusque ipsis proprios coarctantur, statim sese, membranâ quâdam dilaceratâ extendentes. Illæ sunt quæ ovum recipiunt, & in uterum deducunt. Nec extremitatis tubarum à testibus distantiam accuset: hanc reperies in oviparis, in quibus tenuissimò membranarum intervntu, ovarium infundibulò annectitur. Tubarum, & testium unionem juvat, illarum fibras vellicans, seminis virilis spiritus, ad testiculos ascendens, ovis fecunditatem daturus. Is solus crassissimam testiculorum membranam permeat, in ovumque intrusus, materiam intra ipsius membranas contentam incassat, atque in globuli formam redigit, brevi ovum foras propulsuri. Substantia quoque ovi, facile impulsioni cedens, ipsius favet in uterum prolapsui. Novo hospiti natura epiparè prospiciens, laudabilis humoris copiam ad uterum amandat, ut in eo tanquam in fertilissimo Arvo incrementum sumat. Hujus humoris distributioni confert spiritus, qui dum fœtus humani partes in ovo contentas explicat, simul viam humori nutritiò munit; sicque jure, & meritò corporis humani fabricæ idoneus habetur auctor.

I I I.

OVUM corporis producendi compendium. Illius nomine unum intelligas germen, partes delineatas in tantulo spatio cœrens. Vitellus, albumen, eorum animantium ovis, quæ intra se ea non foveant, vel plantarum seminibus quid analogum, necessaria sunt. Testa, durior ille cortex, ovo probè denegatur, non solum mulierum, sed etiam serpentum, ranarum, & piscium ovis non concessus. Mulieres, ova in suis testibus, melius ovaris, concludunt. Horum vesiculæ easdem mutationes subeunt, quas vesiculæ Racemo affixæ Avium, ex communi consensu ovipararum. Omnem ovi naturam complectitur cicatticula, seu germen. An verò quæ nunc excluduntur ova, primi germinis vi efformentur? An in ipso contenta fuerint omnia, &

inclusa? Nodus Philosophicus erit Apolline dignus. Vasis spermaticis ad testiculos allatus sanguis, tum ipsos, cum ova nutrit, & ad quandam maturitatis gradum promovet. Ova quippe in puellis virò maturis, ad eam amplitudinem crescunt, quæ ovarii oneri non sit, quæque corpusculum his contentum, spiritui maris recipiendo idoneum reddat. Tunc cum jungitur nobile par amantùm, quorum idem ardor sit, & impetus; hortò muliebri fecunditer irrigarò, masculini seminis spiritus, testes, ovumque per tubas subit. Inde dilatatum, & jam amplius factum ovum, testiculi membranam dilacerat, in patulum tubæ orificium decedit, cujus undulatà constrictione in uterum devolvitur. Undulatus hic in motricibus tubarum fibris motus, obscuros dolores, sensumque illum murium quasi gradientium in fœminis excitat, primis à fecundò coitu diebus. Nulli adhuc uteri parti firmiter adheret ovum, liberum remanet, nullibi, nisi quâ parte efformanda est placenta, immorandum. Conjici tamen potest alterutri potiùs uteri angulò agglutinari, ob loci angustiam, atque humoris ex tuba promanantis visciditatem. Hic, sive alibi detentum ovum, uteri calore fovetur, quò spiritus maris intra ipsum receptus, magis ac magis in motum cieatur. Spiritus ille, majori tùm impetu fortis partes subit, sanguinemque è corculò compendiarri illius animalis secum trahens, cor moveri docet, circuitumque inchoat. Eòdem spiritus motu omnes extenduntur partes, quibus aliquomodo apparentibus, vasa efformantur umbilicalia, increscitque placenta rudimentum. Placenta materiam sanguinis per venam umbilicalem fœtui suppeditat, sanguine fœtus ipsa nutrienda. Ovum duabus constabat tunicis. Prima materiâ limpidiissimâ referta erat, in cujus medio, aliud quasi ovum, suâ quoque membranâ uestitum innatabat. Hæ tunica olim ovi, nunc fœtus tunicae sunt. In his jam, per os, humore in chorio contentò, & sanguine per vasa umbilicalia nutritur fœtus; eòdem motu quò formatus, & nutritus fuit, in lucem edendus.

I V.

HÆC omnia materiæ variè figuratæ, & dispositæ motus sunt. Ab unâ ovi structurâ, spirituque motore dependent. Confusas, extra se tamen positas corporis producendi partes continet Ovum, hæ spiritu huc, & illuc permeante evolvuntur, explicantur. Magni erit exempli res parva. Chirotheca subtilissimo corio confecta, validâ manuum compressione si attrahatur, sit rudis, indigestaque moles, quæ inspiratò intus aëre, pristinam recuperat figuram. Majoris est momenti variarum adeò, adeò nexarum, sibi que invicem mutuis stantium officii particularum evolutio: sed quid efficere non valet, spiritus supremâ Dei lege motus, maximâ roboris vi, mirabili fermenti virtute præditus. Quid verò ardui molitur? partes primùm latentes oculis exponit. Ad hoc agens duntaxat corporeum requiritur. Movendas, tangendas sese offerunt partes materiæ, quæ nec aptius moveri, nec facilius quàm à corpore tangi possunt. Nutritio, accretio, generatio, ad mortis leges exigendæ. Anima hujus domicilii structuræ non invigilat, in quo non constituitur nisi absolutò; hujus machinæ motionibus non incumbit, quibus ne quidem obscuriori cogitatione applicatur. Quàm varia & ambigua animæ fors, & conditio! E cæle-

stibus natalitia ducit, ut materiæ, sic generationis, & corruptionis expers; humano corpori ita mancipatur, ut illi semel juncta, absque sensibus nihil cognoscat. Apage ideas innatas: Hæ, si quæ sint, corporis consortio evanescent. Quid, facta semel animæ, & corporis nusquam satis explicandâ unione, cognoscit absque suo instrumento Anima? Organis illa destituitur; torpet ipsius vis, obscuratur intellectus; hinc ipsa intimè præsens corpori, quidquid in hoc vel geritur, vel continetur, ignorat; organorum defectu, quorum ope hæc possit percipere.

V.

MATERIAM quam supremâ suâ potestate creavit, solò nutu agitat Deus; non item Anima: Hæc non agitat molem nec sese corpore miscet. Opus illud Deo dignum; Animæ impossibile. Sat est Animæ tam miserò carcere detentæ, hujus impelli, & perturbari motionibus: cur carcerem illum, adeò sibi aliquando gravem, & ineptum, malefana fabricaret? Nonne, si Anima domicilium sibi architectaretur, totis eniteretur viribus, ut proprium sibi construeret? Nonne, si enitatur, animæ dedecori est, tantulam materiæ massam, pro arbitrio non disponere, configurare, & tornare. Corpori solùm assidet Anima sensationum judex, quas sine ipsâ in brutis animantibus observabis. Qui de hoc aliter in opinione sunt, videant, num major materiæ, quàm animæ esse possit ad sentiendum aptitudo? Quid sit sentire queris? Primigenia vox est, definitione carens. Ad sensationem, animalis organa, spirituum motus solùm desiderantur. Illi corporis functionibus obeundis pares, generationi sufficiunt: Hæc, sola particularum in ovo contentarum evolutio, à spiritibus acerrimò motu donatis perfici potest, nec præsentem, nec moderante Animâ.

Non ergo corporis humani fabricæ præest Anima.

Domini Doctores disputaturi.

M. Joannes - Baptista - Gabriel Fressant.

M. Petrus Bonnet Bourdelot, Medicus Regis perpetuo ordinarius.

M. Antonius le Moine.

M. Michael Sauvalle.

M. Joannes - Baptista - Renatus Moreau, Prof. Regius.

M. Guido Crescentius Fagon, Primarius Christianissimæ Regis, Medicus, & Archiatrorum comes.

M. Ludovicus Poirier, Chirurgia Professor.

M. Renatus le Comte.

M. Jacobus de Bourges.

Proponebat Parisiis HONORATUS MICHELET, Barjolenfis
è Gallo-Provincia Baccalaureus Medicus. A. R. S. H. 1694.

Apud Franciscum Muguet, Regis & Facultatis Medicinæ Typographum.